

Na osnovu člana 24. stav 1. Zakona o trezoru u Federaciji Bosne i Hercegovine ("Službene novine Federacije BiH", broj 19/03) i poglavlja IX Pravilnika o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine ("Službene novine Federacije BiH", broj 6/05), ministar finansija, uz saglasnost Vlade Kantona Sarajevo, donosi

#### **PRAVILNIK**

### **O PROCEDURAMA ZA POVRAT VIŠE ILI POGREŠNO UPLAĆENIH JAVNIH PRIHODA SA JEDINSTVENOG RAČUNA TREZORA KANTONA SARAJEVO**

#### **I - OPĆE ODREDBE**

##### **Član 1.**

Ovim pravilnikom uređuju se procedure za povrat više ili pogrešno uplaćenih javnih prihoda sa Jedinštenog računa trezora Kantona Sarajevo (u daljnjem tekstu: JRT) kojim raspolaže Ministarstvo finansija Kantona Sarajevo (u daljnjem tekstu: Ministarstvo finansija) i preknjiženje pogrešno ili više uplaćenih prihoda.

##### **Član 2.**

Pogrešno uplaćenim prihodom smatra se prihod koji nije uplaćen na način propisan Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine ("Službene novine Federacije BiH", broj 6/05).

Više uplaćenim prihodom smatra se uplata koja je evidentirana na JRT u većem iznosu od utvrđene obaveze.

#### **II - POVRAT POGREŠNO ILI VIŠE UPLAĆENIH PRIHODA**

##### **Član 3.**

Postupak za povrat pogrešno ili više uplaćenih prihoda pokreće se na osnovu pisanog zahtjeva uplatioca.

##### **Član 4.**

Zahtjev za povrat pogrešno ili više uplaćenog prihoda i to:

- poreza, podnosi se ispostavi Porezne uprave Federacije Bosne i Hercegovine (u daljnjem tekstu: Porezna uprava), nadležnoj prema sjedištu pravnog lica odnosno prebivalištu poreznog obveznika fizičke osobe (obrtnika i građanina) i to za povrat onih prihoda o kojima Porezna uprava vodi analitičku evidenciju;
- naknade i takse (administrativne i komunalne), podnosi se nadležnom organu uprave koji je naložio plaćanje takse i naknade ili za čiji je rad plaćena taksa i naknada;
- sudske takse i novčane kazne koje izriču sudovi, podnosi se nadležnom sudu koji je predmet rješavao;
- novčane kazne iz poglavlja V- Novčane kazne, tačka 15.2. Pravilnika o načinu uplate javnih prihoda budžeta i vanbudžetskih fondova na teritoriji Federacije BiH, podnosi se organu koji je izrekao novčanu kaznu;

- neporeznog prihoda, podnosi se korisniku prihoda.

#### Član 5.

Uz zahtjev iz člana 4. ovog pravilnika prilaže se dokaz o izvršenoj uplati i drugi dokazi predviđeni zakonom i drugim propisima kojima se reguliše taj prihod koji je pogrešno ili više uplaćen.

#### Član 6.

Nadležni organ iz člana 4. ovog pravilnika na osnovu analitičke evidencije i dokumentacije sa kojom raspolaže i dokumentacije priložene uz zahtjev uplatioca u skladu sa odredbama Zakona o upravnom postupku, drugim zakonima i propisima kojima je regulisan taj prihod, donosi rješenje o utvrđivanju pogrešno ili više uplaćenih prihoda.

Rješenjem iz stava 1. ovog člana utvrđuju se sljedeći podaci i činjenice:

- naziv / ime i sjedište / adresa uplatioca, odnosno pravnog ili fizičkog lica kojem se odobrava povrat pogrešno ili više uplaćenog prihoda;
- iznos sredstava za povrat,
- svi podaci o pogrešnoj i ispravnoj uplati (broj računa, vrsta prihoda, oznaka općine i dr.)
- identifikacioni broj uplatioca, broj žiroračuna i naziv banke kod koje je račun otvoren za uplatioca koji je pravno lice,
- jedinstveni matični broj uplatioca, broj tekućeg računa i naziv banke kod koje je račun otvoren za uplatioca koji je fizičko lice.

Rješenjem iz stava 1. treba da sadrži i druge podatke koji su bitni za izvršenje povrata pogrešno i više uplaćenih prihoda sa JRT.

#### Član 7.

Nadležni organ iz člana 4. ovog pravilnika po izvršnosti donijetog rješenja o utvrđivanju pogrešno ili više uplaćenih prihoda, dužan je Ovo rješenje dostaviti Ministarstvu finansija radi izvršenja povrata sa JRT.

Ministarstvo finansija u skladu sa svojim nadležnostima može zahtijevati od nadležnog organa iz člana 4. ovog pravilnika da dostavi kompletan spis predmeta na osnovu kojeg je doneseno rješenje o utvrđivanju pogrešno ili više uplaćenog prihoda.

#### Član 8.

Ministarstvo finansija po dobijanju rješenja iz člana 6. ovog pravilnika provjerava uvidom u dokumentaciju i evidenciju sa kojom raspolaže Trezor da li su podaci o više ili pogrešno uplaćenom prihodu evidentirani na JRT.

#### Član 9.

Rješenje o odobravanju povrata pogrešno ili više uplaćenih prihoda sa JRT donosi Ministarstvo finansija u skladu sa Zakonom o izvršenju budžeta za tekuću godinu.

Rješenje iz stava 1. ovog člana donosi se nakon potvrde Trezora da je na JRT evidentirana uplata pogrešno ili više uplaćenog prihoda i na osnovu podataka utvrđenih od strane nadležnog organa u rješenju iz člana 6. ovog pravilnika.

Na osnovu rješenja iz stava 1. ovog člana, Ministarstvo finansija izdaje nalog za povrat sredstava sa JRT.

#### Član 10.

Nalog za povrat pogrešno ili više uplaćenih prihoda sa JRT popunjava se u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH.

Nalog za povrat pogrešno ili više uplaćenih prihoda sa JRT potpisuju zakonom ovlaštene osobe.

#### Član 11.

Povrat pogrešno ili više uplaćenih prihoda koji su uplaćeni u tekućoj fiskalnoj godini vrši se sa depozitnog računa javnih prihoda budžeta Kantona iz tekućeg priliva na osnovu rješenja o odobravanju povrata koje donosi ministar finansija.

#### Član 12.

Povrat pogrešno ili više uplaćenih prihoda koji nisu uplaćeni u tekućoj fiskalnoj godini, a koji su u cijelosti prihod Kantona vrši se sa transakcijskog računa javnih prihoda budžeta Kantona iz sredstava planiranih u razdjelu Ministarstva finansija pozicija povrat pogrešnih uplata, na osnovu rješenja o odobravanju povrata koje donosi ministar finansija.

Povrat pogrešno ili više uplaćenih prihoda koji nisu uplaćeni u tekućoj godini, koji se prema važećim propisima dijele u određenim procentima između više korisnika prihoda, vrši se sa transakcijskog računa korisnika javnih prihoda, na osnovu rješenja o odobravanju povrata koje donosi korisnik prihoda.

Rješenje iz stava 1. i 2. ovog člana korisnik prihoda donosi na osnovu potvrde Trezora da je izvršena uplata i raspodjela prihoda korisniku, dokumentacije i evidencije sa kojom raspolaže vlasnik depozitnog računa i rješenja iz člana 6. ovog pravilnika.

#### Član 13.

Korisnik prihoda iz stava 2. člana 12. ovog pravilnika je dužan obavijestiti Ministarstvo finansija o izvršenom povratu više ili pogrešno uplaćenog javnog prihoda.

#### Član 14.

Povrat pogrešno ili više uplaćenih prihoda, koji nastaju zbog tehničkih grešaka koje napravi banka ili drugi učesnici u platnom prometu prilikom obrade naloga za uplatu, vrši se po proceduri koja je utvrđena u ovom pravilniku.

### III - PREKNJIŽENJE POGREŠNO ILI VIŠE UPLAĆENIH PRIHODA

#### Član 15.

Porezi koji su uplaćeni na pravilan depozitni račun za prikupljanje javnih prihoda budžeta Kantona, ali na pogrešnu vrstu poreza ili sa pogrešnom statističkom oznakom općine, po zahtjevu uplatioca mogu se preknjižiti.

Porez koji je uplaćen u većem iznosu od utvrđene obaveze, odnosno više uplaćen porez može se preknjižiti na drugu dospjelu poreznu obavezu u skladu sa zakonom i podzakonskim aktima.

#### Član 16.

Zahtjev za preknjiženje pogrešno ili više uplaćenog poreza podnosi se nadležnoj ispostavi Porezne uprave u skladu sa odredbama člana 4. ovog pravilnika.

Uz zahtjev se prilaže dokaz o izvršenoj uplati.

Preknjiženje pogrešno ili više uplaćenog poreza vrši ispostava Porezne uprave koja vodi analitičku evidenciju poreza koji je pogrešno ili više uplaćen, a obavijest o izvršenom preknjiženju dostavlja Ministarstvu finansija.

Ministarstvo finansija na osnovu dostavljene obavijesti iz prethodnog stava, iz tekućeg priliva na depozitnom računu, vrši preknjiženje pogrešno ili više uplaćenog poreza.

#### Član 17.

Po nalogu nadležnog kontrolnog organa iz člana 4. ovog pravilnika mogu se preknjižiti i drugi pogrešno uplaćeni prihodi.

Preknjiženje pogrešno uplaćenog prihoda od sopstvene djelatnosti budžetskog korisnika vrši se na osnovu Uputstva o preknjiženju pogrešno uplaćenih prihoda od sopstvene djelatnosti budžetskih korisnika ("Službene novine Kantona Sarajevo", broj 26/03 i 14/04).

Preknjiženje pogrešno uplaćenog granta i donacije vrši se na osnovu Uputstva o uplatama donacija i grantova za budžetske korisnike ("Službene novine Kantona Sarajevo", broj 14/04).

**Član 18.**

Ako je uplata javnih prihoda izvršena na pogrešan depozitni račun, smatra se da obaveza po osnovu javnog prihoda nije ni izmirena.

Uplatilac može tek nakon izvršene pravilne uplate prihoda zahtijevati povrat prihoda koji je uplatio na pogrešan depozitni račun.

**Član 19.**

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 08-01-14-14121  
marta 2005. godine  
Sarajevo

Ministar  
**Aida Haverić, s. r.**